

عمرو المصرى

ورقة بفرة

أشعار بالعامية المصرية

صدرت الطبعة الأولى فى ديسمبر 2019



ورقة بفرة (أشعار بالعامية المصرية)

بطاقة الكتاب

عنوان المؤلف	ورقة بفرة
المؤلف	عمرو المصرى
التصنيف	أشعار بالعامية المصرية
رقم الإيداع	2019 - 27806
الترقيم الدولي	978-977-6771-34-5
رقم الإصدار الداخلى	553 الطبعة الاولى ديسمبر 2019
عدد الصفحات	92 صفحة
تصميم الغلاف	مؤسسة النيل والفرات

جميع حقوق الطبع والنشر محفوظة للمؤلف، ولا يحق لأى دار نشر طبع ونشر وتوزيع الكتاب أو ترجمته أو الاقتباس منه أو نشره على انت الا بموافقة كتابية وموثقة من المؤلف

مؤسسة النيل والفرات للطبع والنشر والتوزيع

ثورة مصرية تشرق إبداعاً على الوطن العربي

رئيس مجلس الإدارة

ناجى عبد المنعم



رخصة مزاولة مهنة: 58365 - سجل تجاري: 13242 / 2017 - بطاقة ضريبية: 35-01-572

عضو عامل باتحاد الناشرين المصريين رقم 941 لسنة 2018

هاتف: 01011256943 - 01116202218 - 01202541192 تليفاكس: 020554372901

البريد الإلكتروني: nagyegy200064@gmail.com

البريد الإلكتروني: alnilwaalfourat@gmail.com

المقر الرئيسي: ج.م.ع. محافظة الشرقية - العاشر من رمضان - مجاورة 13 - أمام سنتر الـ 13 - عقار 304

الاهداء

إليها
والى
أنا...

عمرو المصرى



قسم الشرطة

ولأن عنيكي يا مولاتي ..
جواز السفر المستخرج
من قسم الشرطة التابع ..
مديرية أمن العشاق
ومدون في سجلات الروح ..
إني مسافر لحدودك
وماكنتش هاعرف إني ..
هايتم القبض عليا لما أوصل لك
مع إني بحبك ، ، وف حبك ..
إتعلت فنون الشعر
وعرفني الشعر
وفطمت القلب عليكي
واتعلت ازاي أتنازل ..
عن عزة نفسي معاكي ..
ومش خجلان
وعرفت كمان ..
إن تاريخ البشر الممتد - بجد -
بيبدأ من حد عنيكي
وان السبب الأوحد لوقوف النيل ..



لما مشينا على الكورنيش ..
إنك بصيتي عليه
فاحترمك جدًا
حتى الموج الهادي ..
اصطف على الشطين
وبيعزف على أنغامه نشيدنا الوطني
وان نزول المطر الزايد في (مطروح) ..
في اليوم الثاني من مؤتمر الأدباء
علشان برضه كنتي هناك
فاتسجل إنه العيد القومي الإستثنائي
وعرفت اقراكي وبالتشكيل
في كل لغات العشق الـ مش مكتوبة
وان القناديل اللي بيحدفها الموج ع الشط ..
بتنور لما تشوفك
إتعلمت أعيد تكويني وتشكلي الجغرافي
واشطب كل التفاصيل الـ مش مرغوبة
- كلمة ف سرك .. -
- اتعودت أكون اللعبة اللي بتكسر ها إيديكي
ومش ندمان -
واتعودت حضور الندوات الثقافية ..
شرب الشاي ع القهوة
واتجرات وحطيت صورتك خلفية
على وش موبايلي ..



ومش محتاج لعينَيَا اشوفك بيهم
ولا لإيديا تضمك
ما انتي كسوة جسمي
وبفرح لَمَا حروفك تسبق اسمي
واتباهى باني عرفتك
عرفوني الناس
وبان في عينيهم
وعرفوا بانك مصدر كل قصايدى الموجودة
واللي ف علم الغيب
عرفوني باني باحبك
واكثر واحد بيحبك على وش الأرض
ولأنك مرسومة على جسمي خريطة
ومحيطه بكل اليايس والاخضر
وبحور الشّعر
وكان الشمس قصيدة وبنت حويطة
مش عايزة تغيب عن وشك أبدًا
بتغازل موج البحر
وتنزل تغطس تغسل ضفايرها
ونن عينيها
علشان لما هاتطلع تاني ..
هاتشوفك أجمل
وعروقي زي خطوط الطول والعرض
وبفرض باني عشقتك



ومخبي القلب النازف عشق عشائك
- بيعاني الموت -
خببته ف شنطة عمري
وعمري ما كنت مخالف ..
لقانون العشق المسموح
بيتم القبض عليّ !!
والله ما كنت مصدق أنني هُنت عليكي
وقفلتي حدودك
وبأيديك لغيتي وجودك من جوايا
ورميتي السلك الشايك ..
بيني وبينك ..
وانا بيني وبينك ..
بلعن خوفك اللي هزمني
ومنعني من إنني اشوفك
وكأنني متبلغ عني
من حرس البرج الواقف فوق أسوارك
والقلب النازف عشق عشائك ..
بعد ما كان بيعاني الموت ..
اتنفخت فيه الروح
وف أول نقطة تفتيش ..
اتصادر مني

فى محطة مصر

صفارة القطر بتعلن..
عن لقا وفراق
شايلى مع حمل الدنيا..
حمل الناس
والحلم انداس تحت الخطوات
معجونة الدمعة..بالبسمات
كان واقف على شباك القطر..
وخيوط الشوق..
ممدودة ما بينهم
وعينيه مكسية دموع
عناقيد الضحكة المفروطة..
تحت العجلات
عمالة بتصرخ م الفرقة
والقطر بيسحب
وكانه بيسرق آخر حلم فاضل له
فى خزين الروح
وبيهرب فى متاهة ليل
مقتول الوقت ف قلب القطر..
بالحكايات



بدايتها سؤال
نازل فين ؟
مع كوباية الشاي المغلية..
فوق كل رصيف
ورغيف العيش أبو وش مكرمش
والمتزين بعيدان الكبريت
وبعقب سيجارة
عكاز الفقرا
والمسنودة عليه..
جدران البطن المشروخة من الجوع
والنايم على كتف الأوجاع
مقفولة عينيه على دمة ونشفت
معذورة الضحكة..
لما بتتأخر على وش الناس
وهتيجي إزاي..
والياس منبت ف التجاعيد
والسكة حديد
والقطر مخالف للمواعيد
اتعود لما بيتعب ..
بيخزن للي بيجي وراه
وعساكر جيش..
فرحانة بالأجازات
وف ذات الوقت..

شايلىن الهم ف وقت العودة
ويا ولداااااااااااا
وعيون مجافىها النوم
وبتلمع من كتر اللفة
والقلب الموجه ..
من عطش الفرقة
بيحلم إنه بيشرب من بحر لقاءه
بعد ما كان مشتاق
القطر المراجيح في الريح
وبينزف ع القضبان مواويل
وبيرجع تاني .. صفارته بتعلن
عن لقاء وفراق ..
ف محطة مصر

لغتي

كل لغات الأرض قديمة
ومش قادرة تقولك
عاجزة عن وصف ملامحك
وبوسعي أرسم كل ما فيكي بالتفصيل
وحدي / أمتلك اللغة الخاصة
علشان أرسم حتى أدق التفاصيل
لغتي .. الممزوجة بكل بحور الشعر
وان كانت مختلفة فيها التفاعيل
على قد ملامحك بس
وماحدث يقدر يتهاها حروف
مابتعرفش أمان
ولا تعرف خوف
ماتحبش اكون مكسوف ..
وانا بارسم صورتك
وباجرد كل حروفك ..
من أدوات التشكيل
ونقاط الضعف
وعلامات الاستفهام
مابتقالش كلام



مابتتحطش على أي سطور
- علشان تظهر بالترتيب -
لكن وقت ماباكتب عنك ..
و اوصف صورتك
السطر هو اللي بيمشي ورايا
بجد / ويتمد بحد حروفك
لغتي .. من وقت ماخرجت مني ..
وبدا العالم رسم خريطة حب جديدة
وبدا التقويم العشقي الميلادي
وبدأت فى التنقيب
فى قواميس الكلمات
طول اليوم مابتتعيش
رغم العطلات الرسمية ..
مابتعرفش أجازة
أو أي استثناءات
علشان تقدر تستوعب ..
كل مساحة وصفك
لغتي.. مابتقبلش القسمة
أو تعرف شكل التزوير
خالیه من أدوات النصب
لغة تفصيل
منسوجه من أضواء الشمس
أو من ضي القناديل

منسوجه حرير
وحروفها زي العصافير
بتطير وتحط فى جنة عشقك
لغتي .. سألوني عليها
إيه مصدرها ؟
ساعتها فرحت وقلت دخلت التاريخ
وانا متأكد إني معاكى
دخلت التاريخ
أو كتبوني في موسوعة الأرقام القياسية
لكن .. اتهموني بالتحريف والتغيير
واتهموني بقلب نظام الحكم
واني عديت الخط الأحمر
واني السبب الرسمي لتسونامي
ولكاترينا
وكل الأعاصير
اتهموني بالتشهير للنثر
ولشعر الفصحى والعامية
وكل القنوات العربية
ساعتها ، عرفت بان ماحدث شافك
ولا صابه سهم عينيكي
لغتي ..
الموجودة في كتب الجغرافيا ..
والنايمة في حضن الأهرامات ..



واللي بتسهر طول الليل ..
تتغزل فيكي
في معبد حتشبسوت ..
هاتموت لو قالت غيرك
الحاصله على شهادات التقدير
في التعبير عن حبي إلكي ..
شبهى تمام
ماحبش شرب القهوة السادة
وتحب التدخين
وبتكره كسر الأوزان في الشعر
وبتعشق صوت الست
وصوت الطلبة في مدارسهم ..
لما يحيوا العلم الصبح
وبتعشق طعم النيل ..
مع طبق الفول بالزيت الحار
وبتسمتع بقراءة القرآن
وياخذها صوت الأناجيل
وبتخضر يوم الحد مع الرهبان
كانت واقفة ع الضفة الثانيه في ستة اكتوبر..
بتشد إيدين العسكر وتحبيهم
وتغني وترقص تاني معاهم..
بعد النصر
وف آخر الليل ..

مشهد من العقل الباطن

وكان اليوم اللي ما عشتوش
أنا عيشته معاكى
وكانك عالم
مالم تتمكن منه نساء الدنيا جميعا
واللي اجتمعت فيكى لوحدك
وكانك من قبل ما جيشك يعلن استعماري
وانا بستسلم ورفعت الراية البيضاء
لكن لم اطلب أبداً إنك تستكفي
من إطلاق النظرات والابتسامات
جايز جداً قلبك يتنفس بعض هوائي
ولان الاستعمار الكاسح
من عينيك
ومن خديك
ومن شفتيك
ومن نهديك
فوق حدودي
خلي وجودي استثنائي
وفتحت القلب عشائك
وانتي دخلتي سريعا

وكأنك عالم
مالم تتمكن منه نساء الدنيا جميعا
وكأنني لأول مرة عينيا تروح ف النوم
وباكل طبق الرز بتاعي
مع إن الوقت قليل جدًا
وبحس بأيدك
بطبطب على جسمي
وتهشي البرد السانن أنياه عليه
وباحس حرارة جسمك بتدفيني
وبتخبيني فى حضنك
وتغفيلي(هوووو نام وادبحلك جوزين حمام)
وبتضميني
وانا سامع صوتك
وانت بتقرى سورة الفاتحة
وأية الكرسي واللي تيسر م القرآن
وبترفيني
من عين البنت الواقفة بتستناك
من عين الولد الواقف برضه معاك
من عين الشعر
وعين اللي ما شافك ولا صلى
هنا وهناك
وتدعي ربنا يشفيني
واحس الحلم المتأخر



بيخبط على بابي
وكأني باشوفك مشهد من العقل الباطن
واشوف الدنيا فى عز خريفها / ربيعاً
وكانك عالم
ما لم تتمكن منه نساء الدنيا جميعاً
واللي اجتمعت فيكي لوحدك.



مجهول

بين الحياة والموت..
وجع
ولأنه ممنوع الوقوف..
أحلامي عكس الاتجاه
حلم الحياة..
مأجور
مكتوب لي في شهادة ميلاد..
تصريح مرور
من مُحتمل..
إلى مُحتمل..
أجهل مصيري لمنتهاه
أحلام بتعرج ع السكك
والنمل مستطعم عكاكيز الأمل
جوه الكتب..
كل الحروف جوه الكتب..
بتئن فوق ظهر السطور
مقفولة عين الصبح بالترباس
وايد الليل بتخفق بسمته
والشمس بتعافر خلاصها م السحاب
عقد الندى المفروط.. تعب

مستني باب السنبلة لو يفتح
ضي القمر هربان
وانا ..
متداري تحت المقصلة..
مستني شدة خيط
بايد مجهول.

ما يطلبه المستمعون

إزاي ؛ هاقدر اخفيكي؟!
وانتي بتفوحى من كلماتي
ومن تحت هدومي
ودقاتي مضبوطة على خطاويكي
إزاي اخفيكي?!
من كل عيون
ومن كاميرات التليفزيون ..
اللي بترصد خطاويا
لجل ما توصل ليكي
إزاي اخفيكي?!
وانتي معنى للحرية
لكل الثورات العربية
ولانك شمس ف لغتي
وف كتاباتي
حتى قصايدى بتهرب من دواويني
وتدور تانى عليكي
إزاي اخفيكي?!
وانتي ملامحك واضحة ف نن عينيا
وماعرفتش ليه الناس بتحب تسلم



بأيديها عليا ..
إلا لما اكتشفوكي ف كل خطوط مرسومة
في كف إيديا
وباشوفهم واقفين حواليلي
ازاي اخفيكي
من عدسات التصوير
وانتي بقيتي جزء لا يتجزأ
من منهج هذا العام
في جميع الكتب الدراسية
وفوق الكرة الارضية خريطة ..
بترسم كل حدودي الجغرافيا
والإقليمية الممتدة من بحر عينيكي
اللا معقول واللانهاية
وانا لسة باحاول
على قد ما بقدر اني احميكي
ازاي اخفيكي ؟!
وانتي بقيتي ضمن اهتمامات الدول العظمى
والمادة المكتوبة في نشرات الاخبار
وما يطلبه المستمعون
وسبباً، في تحسين العلاقات الدبلوماسية
والاغرب !!
اني كل ما احاول ..
بالاقيكي مرسومة على كل العملات الورقية

"ملحوظة "

العالم كله بيستنى الشمس
وهى بتتعتمد على تمثال رمسيس
وانتي اعتمدوكي ظاهرة فلكية
يا من ...
بتنام الشمس في حضن إيديكي
ازاي
اخفيكي ؟!.



ورقة كوشيه

البنبت المرسومة ..
على جلدة كراستي ..
كسرت كل قيود الأسر ..
وفكت كل حبال الألوان المربوطة
فوق دراعاتها
بعد ما شبعنت من كلماتي
ودخلت جوه قصايدي
بقت البنبت قصيدة
لكن ..
سيئة السمعة
اتفضت بكارتها
من كل الأقلام الموجودة
والمقصوف رقبتها
البنبت المرسومة ..
على لوحة قلبي من الخارج
عرفتها الناس
واحترامتها
ضاعت كرامتها
لما اتعرضت في الفتارين

واقفة بدون ملابسها
فرحت بالنظرة اللي بتلمسها
وتتحسسها
رسمت شكل عريسها ..
على لوحة إزاز
البنيت المرسومة ..
على ورقة كوتشينة ..
وبتضحك بالوشين
وبتضحك ع الولدين
لمت كل ولاد الكوتشينة عليها
والواحد منهم ..
نفسه ياكلها
ويبصر بيها
ف الليلة الحمرا
حتى الشايب ..
صايف شعره
ورغب طقم سنان
ساحب سيفه
وراكب فرسه
بس لكل جواد له كبوه
والبنيت الواقفة وسط ولاد الكوتشينة ..
زي مراة الأسد (الل...وه)
ملعونة البنيت اللي انحلت

واتحلت بالألوان
واتحلت ضفايرها كمان ..
على كتف الاولاد
ملعونة البنت اللي اتحلت ..
عن قلب الكومي اللي حاميها
وخلت كل ولاد الكوتشينة ..
يتسلوا عليها.

شنطة إيدها

اعتبرتني أمر مؤقت
وان هوايا ..
عمره مؤقت
وان وجودي شكله مؤقت
بس انا عارف نفسي ..
عمري ما احب بجد بشكل مؤقت
كانت بالنسبة لي يقين ..
في زمن اللا معقول
وان عنيتها اللون الأخضر
وسط غابات البترول
كنت باحس بانني سكنت ف شنطة إيدها
واتمشى وسط الأوراق الخاصة
واتدارى بين قصايدها ..
واخاف تقراني ..
يتغير طعم كلامها
وارفع كف إيديا ف وش الناس
لما بتتقدم في الندوات وتقول
وان سألوني عن عنواني ..
باكتب إن محل إقامتي ..
شنطة إيدها



واضحك ؛؛ وأحس بإني ..
إنسان محمول
دائما كان يعصاني الشعر ..
لما اكتب جملة ماتكونشي بتظهر فيها
ويغضب ويللم كل الحركات والسكنات
ويللم تفاعيله
ويجهز شنطة سفره ويرحل ..
وسط عينيها
ويعلن إنه أجازة
عن أي كتابة ما تكونشي عليها .

خطين قلق

فكيت تجاعيد الوجع م الوش
يمكن يبان مفروود
خطين قلق في عينيا واتمدوا
برجين كلام ف القلب و اتهدوا
والعمر ،، آدي العمر ..
أيامه يتعدوا
وفتحت عيني ع الوجع موال
كل الكلام اتقال
ولكنه مش مسموع
من فين يا حلم تفوت
وانت المخالف للطريق
ووقفت ف الممنوع
وقف النهار بيشد إيد الليل من بعد ما اتكعبل
والفجر واقف ع البيبان
تعبان من التخبيط
قلبي العبيط .. لساه مصدقكم
والصبح قلبه اسودّ
وأودّ ،، أيوه أود..
لواخرج من العتمة
ولكني مش عارف

شاي ف عيون الناس بتبص لي إزاي ؟!
اكني سكنت القمر جواي
واكني لبيت دعوته
اسهر معاه واحنا بنشرب شاي
شخللت جيبني بالخرز الازرق
ورميته في وش العباد
يا ايها المعتاد
على الجرح اللي زاد ف القلب / واتسكن
كبر الفساد ف القلب واتمكن
قف يا أنا
وابداً بنفسك من جديد
القطر مش محتاج لقضبان من حديد
علشان يفووووووت
العمر قطره فات ،
والحلم قطره فات
مافضلش غير قطر الوجة ..
ساكن رصيف الذكريات
يا عم سيبك م اللي فات
عيش اللي فاضل من حياتك لو عرفت
واكبح جموح الحزن وارتاح م الام
وماعدش ينفعلك ندم
ملعون ابوه هذا القلم اللي بيكتب قصتك
ملعون ابوه .

الفاعل مجهول

سنين عمالة تتسرب
وايامي .. بتسقط من حساباتي
ماعدش عيون بتتصدق
ولا احلام بتتحقق
قلوب عمالة تتشقق
بفعل الفاعل المجهول
ياطووووول الليل على العاشق
وانا العاشق
وايه اللي يكون مطلوب عشان اعلن
بان ولاني ليكي انتي
وايه مطلوب عشان اعلن
بان الحب خلاني جريئ جدًا
واحارب لجل اوصلك
واقول اني : أنا فدائي
ودائي انتي ودوائي
أنا يا دولة العشاق ...
بخاف اشتاق
مادام القطر عدائي
واخذني لسكة اللا وعي



لا انا باوصل ،
ولا تعبان ،
ولا واقف ،
ولا ماشي ،
وبلغن سلسفيل خاشي
مادام مش عارف المطلوب
عشان اعلن ...
بان هواكي متوصل باجزائي
جزائي اني حبيتك بلا أهداف
وبطمّن وبارجع اخاف
واعيش حالة انعدام الوزن
واشوفها حتى في كتابتي
وايه يمنعي عن حبك
مادام حبيت
صحيفة حالي من ساعة ما حبيتك
" لا يوجد شيء "
ومختومة بتأشيرة ..
بان الوارد المذكور
يجوز جدا ، ومسموح له ..
يمارس حبه في الدنيا كما يحلو
وانا المذكور
وايه مطلوب عشان اعلن ..
بان ولائي ليكي انتي

وبارصف لك شوارع روعي من نبضي
وأبني من بيوت الشعر ما يوصلني لعنيكي
وامد عروقي من أول حروف عشقي
لآخر سطر جوابا طريق ليكي
واهندس في تفاصيلها
وتفاعيلها بتفرح لما تتشبع
وباكتب ما تيسر لي من الأشعار
وايه يمنعي عن حبك
واقول واعلنها للعالم مادام حبيبت
لنا دايين ولا مديون
ومش ناوي اكون خاين
انا صليت
وباقرأ " الفاتحة " واستغفر
بكل ما فيا من احساس
وباتوسل لاهل البيت
انا لبيت خلاص قلبك
وشجعني بان الفاعل المجهول
مخوفنيش
ومن تاني باقولها لك :
وايه يمنعي عن حبك
مادام حبيبت .



تنازل

ورحت هناك ..
وكان لسه المكان فاضي
هنا لحظة ما كنا زمان بنتقابل
وانا قابل على نفسي حاجات يا ما
وبتنازل عن الأشياء
هنا مالت على كتفي
هنا بعترت من جيبي كلام عشقي
هنا كببت سنين العمر قدمها
خلعت القلب من صدري ..
رمىته تحت اقدمها
سحبت الضي من عيني
و نورت لها أيامها
هنا طارت فراشاتني
محقةً لأحلامها
هنا حببت وما اتحببت
واحلامي اللي وخداني لحيث تشاء
وانا كالعادة ...
بتنازل عن الأشياء

حليب قشطه

وش السما مدهون حليب قشطه
حتى النجوم ..
عايمه ف ماجور رايب
إيه تعمل المشطه ..
ف ليل أكرت ؟
يا عشقتا الخناس ومش قادرين نصلي
ونستعيز منه
قلبك بي طرح ماس
وإيدينا بيحنه
وانا قلبي لسه يادوبك إكمنه ..
اتعلم النبض في هواكي جديد ..
واقع في كام ورطه
وش السما مدهون حليب قشطه
انا لسه بدري عليا ماوصلتش
لسه الطريق ممتد من شريانني لعروقك
انا قلت ياما كلام وكأني ماقلتش
والدمعة نازلة فوق خدودي
وهااااااات يا فحت
شجر القا المزروع على جنابي ..
مادد جدوره لشعري وكعابي

بصيت عليه بلقاه بيكبر مش لفوق
بلقاه بيكبر تحت
بخلانه ليه

وانتي اللي في عينيكي الوصال
قلبك حياة ولا
قلبك نجاه ولا
ولا يكون وليّ

قلبك طريق ولا كمين شُرطة
وش السما مدهون حليب قشطة
إنتي اللي علمتيني احبك ع الفطار
انتي اللي علمتيني أقولك في المسا
قبل اما انا

واتخيلك بنوثة حلوة مضفرة الضحكة
متعوديش قلبك على كُتر الجفا
بطّلت احبك في الخفا
طعم الدفا ... مايبتنسش
زعلانة ليه ؟

خليني احبك زي ما احسك
وبلاش تجيني حتى في الأحلام
ولا يكون مسموح لي أحبك بس ع الخرطة
وش السما مدهون حليب قشطة
يا ام الحدود حكايات
تضاريسك المنقوشة فوق جسمي

وخرطها خرّاط البنات..
ترميني فوق صدرك ساعات
واتمشي بين الأهرمات
وارجع أبات ..
بين القا والمستحيل
وأشم ريحتك في الحليب
جوايا أرض بتزرعك
وتخزنك لسنين عجاف
وتسنبلك في سنايل الحنطة
وش السما مدهون حليب قشطة
أنا بشتهيكي في كل يوم زي النفس
زي احتياج القلب للدقات ..
علشان يعيش
رغم اني عاصي للندا ..
لما تنادينني يستجيب
أنا قلبي دولة في الهوى
جواها ثورة وانقلاب
جواها نبض مأيديك
باستأذنك ..
لو حتى من غير انتخاب
تتسلمي السلطة .
وش السما مدهون
حليب قشطة .

وباحسك

وباحسك
وباحس بصوتك ..
بيفك حبال البوح المربوطة
وبيغزل من أحبالي الصوتيه كلام
واستعوض ربنا ف امبارح
ما هو كالأاان جارح
ويطمّن خوفي من الأيام
بيشق دروب العتمة في صدري ..
جداول ضي
سنابل عشق وطارحة سنين أحلام
وباحسك ..

دم بيجري ف الشرايين
بيعدي من بوابة الشوق
من غير ما بيدفع أي رسوم
ولا أي كمين
في طريق متزوّق بالياسمين
يتمرد على جرح سنين
وبيجري وبكل حنين
ف القلب يصب ويرسم صورتك

في التكوين
وبأحسك ..
النفس الداخل فيا وما بيخرجش
من خنصر رجلي .. للإبهام
يتمدد جوه خلايا الجسم المحتل ..
برياح الخوف
واللي انزاحت ..
ساعة ما اتنفستك
وانا ما عرفتش
وماتجراتش ..
أقول الكلمة اللي ف بالك
إيه ..؟! مالك ؟
إستغربتي لما عرفت
واتشجعت وقلت بحبك
وان هواكي ..
إتهجاني حروف ف كتاب العشق
واترجيته إني أشوفك
ف استخرج كل الأوراق المطلوبة ..
تذكرة السفر الخاصة
ومن غير عودة
وجواز مختوم بشعار الحب
والتأشيرة
وصّلني لباب الدرب الفاصل ..

بيني وبينك
و وصلت مطارك
أدخل من حد عينيكي بدون تفتيش
أو أي جمارك
مع إني محمل شوق وحنين
بيكفي سنين
تستقبلني دقات قلبك بالترحاب
واتفتح الباب
ولقيتني قصادي
إستغربتني ..؟!
أنا ياما قصادك ماتكلمتش
والنفس الداخل
إتمطع جوايا وبأااات
وان فات الوقت
ماالتفستش
باعرف إن القلب فى بُعدك..
مات .

موجز الأنباء

موجز أنباء الساعة اتناشر
أعلن مسئول الأرصاد الجوية
بعد معاينة كل التقرير اليومية
إن الجو اتغير
نظراً..

لرياح العشق الجايه من نظرة عينك
واللي اجتاحت نُص الكرة الارضية
وعلينا إننا ندارى في النص الباقي
أعلن عن بعض الممنوعات
والتحذيرات

وكأنه قاصدني أنا بالذات
حذرنى من تأخيرى لنُص الليل
خوفاً ..

من عربات الدوريات الانضباطية
وعساكر الاستطلاع ..
اللي معينهم حارس عينك
ليتم القبض عليا ..
في جريمة عشق عينيكي
واتورط في التحريض ..



على إن الناس تستنى شويه
وتشوفك زيي
مسئول الارصاد الجويه ..
مش عارف إني ..
فرعون العشق
وقادر اشق الريح واوصلك
مش عارف إني بادور على إعصارك
طول اليوم
علشان يدخلني
واستنى طوفانك ..
يمكن اتعلم فن العوم
بستنى النظرة ،، البرق ..
تخبط على شبابيكي المقفولة
افتح
والقاها خجولة
وهى بتدخل عيني على استحياء
مسئول الارصاد الجويه ..
أعلن في القنوات الأرضيه
والإنترنت ..
إن الطقس شتاء
قارص جداً
- واحنا في مايو -
استغرب لما لقاني ..

نايم وسط شفايفك
ساحب ضي عينيكي ..
ومتغطي في وسط الشارع
متدّفي بصهد مشاعري ..
الملهوفة لمطرك
وانا نفسي أغني تحت المطرة
زي الاطفال
وافتح إيدي لحبات الثلج
والقائي في ريحته
وطعم المطرة
موجز أنباء الساعة اتانشر ..
مسئول الأرصاد الجوية..
اعتذر اليوم عن تقديم الموجز
نظراً إن سيادته ..
كان قاعد في النص الأول ..
م الكورة الأرضية .

نقطة ومن آخر السطر

النقطة المحبوسة ف آخر السطر ..

بتحاول تهرب

من شباك المنثور

واللي ف آخر سطر ف بير السلم

تطلع على سطح الهامش

علشان..

تطلع فوق جدران العنوان

وتشم عبير النظرة الأولى

النقطة التعبانة ،

الشقيانة ،

الهلكانه ، ..

واللي القلم المجنون ..

دايماً يحبسها بين أقواسه

تعبت من حراسه

النقطة اللي بتتخفى

تحت الفصلة المنقوطة ؛

والمحطوطة على حد السطر المسنون ..

مجنون القلم اللي بيعشقها،

مجنون



من خوفه عليها الغير معلوم المصدر
بيعي عصير الكلمة النازز..
في عروقه اللي بيتحول..
لمداد ملهوف
على حد الشوف ..
لعيون البنت النقطة هناك
و ايدين الزمن اللي بتتحكم
في خطوط العمر المكتوبة بالمقسوم
بتخلي الإحساس معدوم
والقلم المقسوم ..
مابين الرغبة الجامحة لفك قيودها
وبين الأيد ال ماسكة الرقبة ،..
ودايسة على انفاسه
وهو بيكتب
القلم الطالع نازل ..
فوق كل سطور الورقة اياها ..
مرة بيتمرجح ف الإيد ،
ومرة بيتشعلق..
فوق ودن الزمن العاصي للأحلام
وبياخده بعيد ،
وعينه عليها
ويخاف لما بيرجع تاني
يمسك طرف الورقه ويقلبها



ويبدأ صفحة جديدة
والقلم العاشق ..
بيداعبه نفس الحلم المتعلق ..
ع الشماعة في دولاب أفكاره بقاله سنين
ف بداية السطر ، يفتح قوس
ويحط النقطة الي بيعشقها
لكن مابقفلهوش ..
إلا وهو معاها .

بجد

وبجد ..
وانت معايا ..
باتنفس ريحتك زي الأكسجين
وانت بعيد ..
بالاقيني مصاب بهبوطٍ حاد
وبالدوران
وتوقف في نبضات القلب
والاقيني / محتاج
للصدمات الكهربائية
لما تسببي إيديكي عليّ
يخضر العشب الناشف
ويعود النفس المرتد
بجد ..
وبحس حرارة جسمي المرتفعة ..
مرتفعة عن منسوبها العادي
لأقصى حد
وانا بادخل في غيبوبة عشقي
وباشوفني غريق في عينيك
والشط نجاه

وعينيكي حياة
وبقيت محتار
بين الجزر وبين المد
بجد ..

وانا لسة في مرحلة الهذيان..
ولاقيتني باشوف العتمة بالألوان
باكتشف الأرض لأول مرة
وباخطي لأول مرة معاكي
من عتبة باب الأمس لحلم الغد
ولاقيت الكون يمتد
من عند سنابل شعرك
ومن غير حد
وانا باتكلم وياكي في صمتي
وباحس بصهد شفايفك..
لما تسبب بصمتها فوق الخد
بجد..

لأول مرة باحسك داخله في جسمي
مع نقل الدم
وبحدد تفاصيلك وملامحك وحدودك
وانا بسكن دايماً اسفل أول النهدي
وامارس فن الهندسة المعمارية
وانا بارسم صورتك ..
فوق لحم الأهرمات

وحدائق بابل
وف سور الصين
والقاي زي النخل الطارح
في حطين
فوق اشجار الصنت
وجبال الثلج
وحريق الغابات
والقاي باب مفتوح ..
بيد خلني لكرم الكلمات
ولا يوم اترد
واشوفك ..
خارجة من كاسات الورد
فاتنفس ريحتك تاني
يخضر العشب الناشف
ويعود النفس المرتد
بجد .

آه يا جريح

آه يا جريح
آه يا "جبل ماتهز هوش الريح"
أنا ليه باشوف الدمعة في عيونك
و انت اللي من كتر الوجع نايم
و الموت مرفرف بجناحات حايم
على عشه
مين اللي بيهشه لحظة يحين الدور
باكي على حالك
ولا على الأيام
بيني وبين عنبر تمانية جراحة
يا ما كلام
آه يا سفينة العمر / بان شطك
اتعكزي ع الموج
العمر فوج وبيستعد
عمال يمد الجسر للمجهول
لميت حروف اتبعترت من تحت أقدامي
شرقانه / ريحة البنج بتدوّخ
الدنيا بتبوّخ من غير حبايبنا
لسه النهار ملفوف بقطن و شاش



راح الحكيم ولا جاش
وملايكة الرحمة اللي نايمة وقت خدمتها
وانا اللي سهران والأمل ..
مرمي فى سلة مهملات
سهران مع الليل الطويل
وباراقب الشمس اللي محبوسة
وعقارب الساعة اللي سمّت بعضها في إيدي
والصبر متعلق على شماعة المحاليل
طعم الوجع مرمي على السيراميك
معجون مع لون الحيطان
والصمت متعلق مع ستارة
الصمت تحت مخدتك
ما فضلش غير صرخة وجع
تفز عني لو حسيت بانّي با نام
بيني وبين عنبر تمانية جراحة
ياما كلام
من تحت عقب الباب ..
شفت الوجع داخل من الطريقة
عمّال بيتسحب
زاحف على سريرك
و كأنه أفعى بتحضنك بشويش
خايف لإيدهم تمسكه
تدي له حقنة فولتارين



وانت اللي يا ولداه
صوتك محشرج م الأنين
يعلّى بصرخة آآه
أبتاه يا أبتاه يا أبتاه
مين المرافق مين
وانت اللي رافض الانهزام
أو لحظة استسلام
بيني وبين عنبر تمانيّة جراحة ياما كلام .

المشهد

باقولك إيه ..
ما دام عَزَّ اللقا بينا
تعالى نرسم المشهد ..
أنا وانتى على الحیطة
بترابيزه وكرسیین
وتالت فاضى مش عارف هبقى لمین
ونرمي حبة م الذکرى
عن امبارح
أنا الفكرة اللي خارجة حیَز التنفيذ
وأحلامي اللي محبوسة ورا البراویز
وف الجانب شریط أسود
باخبی الشمس ف جیوبی علشانك
واعبّی من ندى القلب اللي كان صابح
ف شریانك
أنا بینك وبینی یا دوب مساحة صوت
ومش سامعك
يجوز یمكن من الدوشة ،
من السكة اللي مرسومة اتجاه واحد ومقفولة
ولا نظرة عیون الناس
وخوفنا من حوادیتهم



تصحى فينا واحنا عيال
حكاية أمنا الغولة
ولا النبضة اللي جوانا وعشناها
لكن فجأه ..
لقينا النبضة مقتولة
غريبة الناس بتتغير من الداخل
مانيش شايفك
مانيش حاسك
مانيش عارفك
لكن قدامي موجودة
حكاية تاني منقولة وبالكربون
وخلفية من الكرتون
عليها رسوم خيال الظل
وبيطلع لي ف لسانه
ونفس حكايتك الأولى
تقولشي فولة مقسومة
وقدامنا مشاريبنا ..
أنا كالعادة واحد شاي
وبرضه سكره زيادة
وانتي بشايك الـ (لبيتون)
كلامك ريحته مش هي
كلام مدبوح
كلام كاتم ف أنفاسه



كلام طالع حلاوة روح
ملاحك .. باهتة ، معدومة
وحتى عنكي مطفية
من اللمعان
وانا بأيدي..
بازيح اليوم عن الماضي
أتاري الوقت مش راضي
أتاري الكرسي مش فاضي
بابص عليه ..
لقيت أحلامي مشلولة
وقدامنا مشاربيننا ..
أنا كالعادة واحد شاي
ويرضه سكره زيادة
وانتي بشايك الـ (لبيتون) .



ورقة بفرة

كان قال لي وهو بيشرّب آخر نفسين
ف سيجارة مش طبيعية ..

— أنا باشرب فنجان القوة بالمقلوب
باطلع فوق النخل العالي لتحت
وباركب فوق أكتاف الظل بتاعي..
عشان ماتعش

وباعدي نهر النيل بالطول
رديت

— ارتحت ؟!

شكلك مسطول

ابقى قابلني ..

لو عديت الحد الفاصل ، بينك وبين أحزانك

ماتعبتش من دور الأراجوز

و دور الكومبارس الصامت ..

والدمية اللي بتتعلق بحبال دايرة

طب فاكّر آخر مرة شفت حبيبك فيها

كانت آخر لمعة حب تبان في عينيها

فكّ حبال البوح المربوطة ف صوتك

واقدر، على كبح جموح العشق الداير فيك



ماتعبتش من سهرك طول الليل
وانت بتذاكر كل كلامها
- وياريتك عاجب -
وكأنك تلميذ خيبان
خايف لو ماعملش الواجب
مع إنك عارف إن العين ..
مابتعلاش ع الحاجب
وعارف في أصول الإتيكيت
وان مرة بكيت ..
ولا حد ها يمسح دمعك غيرك
إرفع درجة استعدادك للحالة القصوى
واحقق قلبك بالقسوة
واتعلم من ألاعيب الناس
والخاصة من نون النسوة
إيه فايذة رمي النرد
ما دام محبوس ف اليك
عيد الدور من ثاني وجرب
واكسر ترابيس زنزانة عشقك واهرب
لللا معقول
وماتنظرش لنص الكوب الفارغ
وماتبكيش ع اللبن المسكوب
حاول ماتمش في يوم مغلوب
نزل بؤقة أحزانك ..



الغارزة في لحم اكتافك م الحمل
هاتروح على فين ؟!
السعي في أرض الله الواسعه يجوز
وان فكرت هاترجع تانى ..
مكانك اصبح محجوز
امسح بصمة روحك ..
من كل طريق في العشق مشيته
من غرفة نومك ،
أمسك ،
بكره ،
يومك ،
لم النبض الـ متبعتر على الأسفلت
وبوكيه الورد الديلان
الـ مرمي على السيراميك
مع دستة شمع ..
الظاهر كان ندر عليك
شكل الحسبة فركت منك
ومابتعرفش القسمة
ودايما اشواقك زائدة
في حالة الجمع
كان فيه قميصين ، ريحة عشقك فيهم
وعلبة مناديل عائلية
غرقانة

من آخر مرة كنت بتحلب عينك م الدمع
لساك مُحْتَل من الكوابيس
والأحلام متاخدة رهاين
والعشق اللي مخليك في مهاين
وماهاين برضه عليك تنساه
يااااااه

لساك بتوزّع كالعادة قصايدك
من على كوبري اكتوبر
في ميدان رمسيس
وبتعلن حالة حبك فيها
كل اللي فاضل لك ف الآخر ..
حبة قصاقيص
لساك مش عارف طعم سجايرك
اذا كانت مثلاً
أو سوبر

مالك ؟!
بتلف الأيام الباقية في ورقة بفرة
مش ناوي تغيّر حالك
وتبقى زي بقية الخلق
وتهد حروف العشق الساكنة ..
في سقف الحلق
مالك ؟! تعبان ؟
افرد جسمك ع الارض وريّح



وخذلك حباية " كيتوفان "
واترحم ع الأيام الجاية
لو كانت زي امبارح
رَد عليا ..
وهو بياخد آخر نفسين ..
— لف لنا سيجارة كمان
بشوية أيام
مع كباية شاي
يمكن انام .

الزمكان

يَا مَنْ ..
عينيكِ خنجرين ما بيرحموش ..
وازاى أحوش نفسي وانا
أنا مَنْ جعلتُ الشَّعرَ في عينيكِ ملتهبا
عَلِمْتُكَ العشقَ ولمْ أتعلمْ الأدبا
وانا لسه واقف بانحني قدام شفايف حضرتك
وبكبرياء
وعلى خطاويك التي ..
هزت مشاعرَ ساحةِ المترو
في محطة الشهداء
وقفَ الجميعُ ليعلموا معنى الولاء
أما أنا ..
فلقد تعلمتُ فنونَ العزفِ من زمنٍ
وجميعُ ما في القلبِ
مِنْ نبضٍ ومن شوقٍ ومن عشقٍ
قد أدمنوا الطربا
وصوابع العشقِ اللي كانت بين شفايفنا
وكأننا.. فرخين حمام
نام اللي نام
وانا وانتِ والليل الطويل



يصحى الكلام
هذا الذي..
يفتح شبابيك الوريد
وبدون ما يستنذن دخول
للا نهاية بدون وصول
واكيد يكون
عشق تمطع في دمي لا ريب فيه
قسماً بخديك اللذين تقاسما التفاح والرطباً..
سأقول أنت حبيبتي
ومليكتي ومدينتي
ماذا سأفعل يا ترى ؟
والشوق ناراً داخلي ..
وعواظي أشعلتها خطبا
يا دوحة العشق التي ..
يتوحد القطبان بين عيونها
واتجمعوا الزمكان
وبترسم كل الخرايط من جديد
حتى التاريخ بيعيد كتابته من جديد
مانتي البراح اللي في عيوني ومانتهاش
وانتي الربيع اللي ف جبيني ...
بيترسم سكة وطريق للعاشقين
وأنا الخريف اللي ف عيونك راح مجاش
ولكنني لا أعرف السبب

هزّي بندهديك اللذين تقاسما الرمان والعنبا
وتعانقا شوقاً لعزف أناملي
كي يسقطا جُملاً
قد أرسلنا ضوءاً من الشمس التي ..
راحت تُسافر في دمي
كيمامتين صغيرتين
علي يدي..
يتعلمان الرقص و اللعب
علمتكِ العشق ولم أتعلم الأدبا.



حديقة الطفل

بتأخذني عينيكي ف كل صباح
وبتمسك إيدي
وتعديني الشارع
وتوديني حديقة الطفل
أدخل من نفق العشق ..
لحديقة الشعر ف عينك
أقعد على شط بحورك ..
والعب بالتفاعيل
وابني بيوت ومراكب
ما عرفتش معنى شقاوة الأطفال الشعراء ..
إلا معاكي
تلاعبي الكلمات الواقعة ..
ف ممر قصايدك
وتغمي عينيا بجملة مفيدة
وبتدارى ورا أشجار الصفصاف ..
المزروعة ف نن عينيكي
عصافير الجنة بتلحقتني
وتوشوشني
وبتفتن لي عليها

والأقيها
ونعيد اللعبة من الأول
أَتَدَارِى وسط رموشك
واتشعلق واتمرجح
واتزحلق على خدك
زي الدمعة اللي بتنزّل من عيني..
لما تسيبي إيديا ف وسط الزحمة واتوه
تلاقيني شفايفك ..
وتهددني
وتطبّط على خدي بحنية
أسستطعم أنفاسك
وحررة حضنك
أُتغَطّى بأحلامي وانام .

ابن عزّ

نَزَّ الوجع من بين جنابك نَزَّ
قلبك يا متحمل على عكاز
بطنك اراز شفاف لأسرارك
والدنيا شادة الحيل على الآخر
بالتالي ؛ ممكن تقسمك وتقسمك
وانت اللي واقف عنصري
ممدود على طرف الحياة
كل البيبان متقفلة
بالضبة والمفتاح
ومالكش سكة للنجاه
أندغ ف أيامك عشان تخلص
واجتر من صبر السنين على قد ما تقدر
قزقز ف أحلامك ومز
انت اللي من دون العباد..
بتمد عودك للسما
باصص لفوق
راضع حليب الشمس ضي
راضي تكون عبّاد
والشمس لو زعلت ف يوم ..

قلبك ما يستطعمش شئ تاني
زهرك ما يفتتحش
صدقني لو حباك أكيد يبقى على علة
والعلة كان مالك
بكره يروح المال وتفضل ..
انت زي ما انت على حالك
كل اللي ممكن تملكه ..
قلبك ، على شوية كرامة اتكونوا
من كل قصة حبتين
ريحة الجراح ..
وحشه

وما بتنطاقش
" والصبر مفتاح الفرج "
ولكنه ما يفتتحش
طعم الحياة مالح
والعيشة مش بتلذ
كل اللي قادر عمله ..
واقف على سنانك تجز
يا مستفز ..
طلع إيدك م الشق
وانفض غبار العشق من روحك
دا مراكب الأحلام غارزة في لحم اليأس
صعب انها تتزق

قوم امتطي ظهر الكلام
فك اللجام من حلقك الناشف
إحساسك الكاشف لشيء مجهول ..
منقول بكربونة أكيد من دفتر الأحوال
آااه يا جدع ..
مجروح بتتنفس وجع
أصرخ وقول
إيه راح يفيدك م السكات
لو كنت مابتتنطقش ؟
دا العشق زي النخل ف العالي
والنخل ما ينولش طرحه ..
إلا لما الريح تهز
يا عم فز
صبرك على المقسوم
ما بين قلبك وبين ..
محبوبتك الشمس اللي ع السكة
وبتاعة الناس كلها
روح قول لها ..
طلع النهار أعمى
ومايسمعش
والليل كما العادة عينيه حمرا
والكل بيحب القمر
بس القمر بيحب مين

ما تصدقوش لو قال ف يوم إنه معاك
الخطوه بالخطوه تلاقيه دايمًا هنا وهناك
ما بقاش يليق دور الوزير تاني عليك
وعساكر الشطرنج ما بتكبرش
إلا على استحياء
مش كل قلب غريق..
بيتعلق ف قشاية
علشان يعيش
وانت اللي ف العشق اغتيت
كنت ابن عزّ
دلوقت قلبك ف الهوى طمعان
يبني له بيت
إيه ياخذ الريح م البلاط..
غير رميته ع الأرض؟!
واخبط دماغك ف الحيطان
مين اللي بيحس انكسار النخل لما بينحني
لو ما ارتواش؟
أفتح قوسين واكتب..
لن يلدغ العاشق من العشق المزيف / مرتين
وانت اللي بتشوف الحقيقة مرتين
والتالّة محسوسة
ليه كل ما تشوف الطريق
واضح إليك .. بتشدّ

خليك كدا
نز الوجع من بين جنابك نز
كل اللي قادر تعملة
واقف على سنائك تجز .

لحظة طيش

شد الغطاء ع الحلم وقت النوم
أحسن ييجي له كابوس
يا أيها المحبوس في ذات نفسك
بكره شبه أمسك
واليوم ماتعرفهوش مودّي لفين
عمر ك كموج البحر ..
عايش مادام عايم
ويموت في لحظة يترمي ع الشط
يا أيها المنحط ..
والمتحط فوق الرف ..
كان سبت نفسك ليه في إيد الريح
أنفخ في دخانك دواير
تتقسم لخطوط
واشرب في شايك اللي يشبه لك
إكمنه مش مضبوط
يا قلبك المقفول بشمع احمر ..
أمسك في إيد ضلك
مادام مش عارف السكة
يفط الشوارع كلها واحدة



هو اللي هيوديك منين مايروح
أو سكة اللي يروح
واملى استمارة موتك المختومة بالأوجاع
واعرف طابورك وانتظر ..
آخر نفس
لحظة عينيك تسكت عن التهيد ..
إعرف بانك وقتها ..
رايح بعيبيد
صبارك المرسوم على قلبك ..
طرح
والكيل طفح
موتك فرح لبعض الناس
ولكنه ليك مؤلم
إفتح سراديب الخلاص ..
للأمنيات الزيف
حلمك كفيف مع إن عينه مفتحة جداً
وتلاقي اسمه بيتكتب ..
في قوائم الممنوع من التحقيق
دمك نزييف سائل على الأسفلت
جرحك بقى ع الكيف
أخرك قصيدة بتتكتب وخلص
تترد فيك الروح في كلام محبينك
أو نظرة استحسان

يا أيها الإنسان ..
مغلوب على أمرك
عمرك فراش محكوم عليه بدري
في أول ضوء
بطل تبص لفوق مادام نظرك ضعيف
الدنيا واسعه وللأسف
إنت اللي بتشوفها ..
يا دوب بيعدي فيها الخيط
وباقولك إيه ..؟!
إردم هويس جرحك بأناتك
إلمس مشاعرك ع السطور
مطّع حروفك ع الورق
خليها تتنفس
إذي البراح للحلم في كتابتك
يمكن في لحظة طيش
يخرج من التقويس .



وضع يد

وكانك ..
أول رعدة إيد ..
بتمس النبض الساكن فيّ بجد
أول ..
طلة شمس ..
تشرق جوه خلايا القلب الساكن ..
خلف السد
نقطة ضي في بحر الضلمة ..
جات وخذتني ..
لجسر الضحكة الواصل ..
بيني وبين شرايين
أحلام الغد
أول دمة حب ..
ترق تنزلها
يشرب جدولها المستني ..
بقاله سنين
فوق الخد
أول شط نجاه ..
بيقرب لي ف وسط الموجه ..

لما تاخذني لحضن المد
وانا ..
بدخلني وافتش فيّ
والقى هواكي فاق الحد
طب والله
كأنك ..
مالكة القلب
بوضع اليد.



شق القمر

فجأة ولقيتك يا قمر..
بتشق بإيديك السحاب
حتى النجوم
فكت إيديها وسعت
فاتشكلت صورة ملامحك ف الفضاء
حكم القضا ..
مكتوب على جبين الزمن
إنتي انتمائي للوطن
إنتي يا صفصافة أمل ..
والقلب تكعيبية
مدّي إيديكي اتشعلقي وارمي فروعك ع الملاء
من بعد ما قلبي اتسرق
ما بقتش اخاف
حلمي اللي مصلوب ع الورق ..
قام انتفض لحظة ما عيني بتنظرك آخر المطاف
يا شمس فوق خدي أنا وف قلبي دفيانة
وما بين شعورك سكتي
وبتكثر المشاوير
يا ام العيون ..

قبضت على كل العبارات التي ..
اتشكلت منها القصيدة بداخلي
يا ام العيون .. بتشدني ..
آخر حدودي للسما
وكانما ..
متجمعة فيها الحياة
كل الفصول الأربعة
وف قلبي قاعدة مربعة
خليتني نبض القلب بيجلجل على القضبان
فاتح سنافور الهوى للريح
عينه بتوصل للمدى
أيامي يا كرايب وكم كانت ف علبة صفيح
نبت في جدرانها الصدى
والنظرة من عينك كما حبة ندى
بترد فيها الروح
والقلب وردة مفتحة
طعم الندي ع الورد مابيكفيش
خليني اعيش هايم ما بين القبتين
واتدارى في شق القمر
من ذا الذي أسرى بقلبي
من حنين لا يضاهيه الحنين
متمنياً ؛ أن امتطي سهوة براقي محلقة فوق الجبين
كل النساء حبيبتي وهم



وانتي اللي قدامي يقين
كل العيون الـ قبل منك ..
كلها بلاستيك
وأنا اللي نايم بين شفائفك من سنين
وانا من سنين ..
بيني وبين الحلم يمكن مش كتير
مجنون انا بشفائفك الـ مليانة بالتعبير
مجنون انا وعارف ..
جنان العشق أمره خطير
واكمني حبيت وبضمير ..
أصبحت متهماً وبالتكفير
ياه إنتي ياه ..
إنتي اللي في عينيكي طرح يأسى حياة
إنتي اللي ف إيديكي رقص كل البنفسج
ويا أغصان الكلام
إنتي اللي فوق خدك نطق صمت الرخام
إنتي اللي لونتي السما بلون السلام
إنتي الإمام والقلب درويشك
وأنا المتيم في الهوى
بامشي على نهج الغرام
- مش برضه مسموح ف الهوى تبقي الإمام -
فلتأذني ، إني أقولك باعشقتك
وتقبلي عشقي مع خالص التقدير

مش قلت لك ..
مجنون انا وعارف ..
جنان العشق أمره خطير .

إنجاز

إرمي براسك ع المخدة وافتكّر ..
ريح على سرير الوجع حبة
وافتح ببيان الذكرى لدموعك
ماحصلش مرة وتاهت الدمعة
عن السكة اللي عرفاها !!
اتخيل الضحكة اللي تايهة عن وشك
إنده عليها في ميكرفون الحي
لسة النهار مش جي
ضل الطريق عن سكتك ياما
إكمنه غيّر سكته في إشارة مقفولة
شد الحزام خلى الوجع يتلم
الحزن بيا ألم
ريحة الوجع تتشم م التجاعيد
يا حلم يا اللي بعيد ..
أخرج من العتمة
أخرج من الكتمة
شم النهار تترد فيك الروح
إنت اللي أسرار قوتك في محبتك
وبتستمد مقاومتك منك

والدنيا محور ارتكاز
مستحلى نومتك ع الوجع
في سريرك الهزاز؟!
إفتح حدودك الاربعة
واخرج من البرواز
وان جاز بانك تنطلق ..
أهو يبقى ليك انجاز
افرد جروحك ع الورق ف الشمس
يمكن في يوم تدبّل
مع إنه بالتأكيد ..
الجرح لو يدبّل ..
ريحته بتفضل فيه .



هَوّهُ

قلبي ورق كرمشته بإيديا
قلبي على الأسفلت منداس
قلبي على الأسفلت مين داس
ويا إحساسي يا أحساسي يا إنتي
كنتي البراح واضيق
كنتي الجدار وانشق
مين اللي سبب لي القلق ..
ساعة يحين الضي في عينيا
شمّرت إيدي م الهوى ..
ونزلتني جوه
وطلعت انا بيا ولكني مش هَوّ
بيني وبينني هَوّهُ متسعة
اسعى يا طير الحب من تاني
دَوّر على عشك اللي ماهوش فيا
قلبي ورق كرمشته بإيديا
فوق الرصيف ..
شُفت الكلام مدبوح وبيفرط
في لسانك المشروط وما عرفتوش
يا ورد يا مرسوم على الحيطه ..

إزاي تفوح ريحتك من الألوان
لم الدموع من فوق فروع قلبك
من قد إيه ؟

والإيد قصيرة وللأسف مع إنها طيلاك
والعين بصيرة بتشتتني لمراقبة المشهد
أشهد بأنك والكلام إخوة فى رصيف واحد
يا قلبها الجاحد ..

يا ابو الكلام يجرح
في الشارع الزحمة اللي متسفلت بأناتي ..
بعترت دقاتي

ورميت بذور الحب ولكنه لم يطرح
مطرح ما راسي تكون راح تبقى رجليا
علشان كده
قلبي ورق كرمشته بإيديا.



ألوان الطيف

ألوان الطيف..
اللي بتتكوّن على طرف شفایفك..
والمرسومة بشكل جناح الطير
وكتير باتمنى أكون صياد
وارمي لك فوق خدي النبض الطعم
أو أزرع فوق صدري العشب
علشان ماتحطي عليه بشفایفك
وانا شایفك..
وكان شعاع الشمس المتنكر على شكل البدر
لما إيديكي بتفتح باب الصبح..
لعصافير الجنة الساكنة تحت سبايك ضيك
بيخليني القلب المحتل
ولما سمعت ف نشرة أخبار الساعة اياها..
بان الشمس ممكن تتأخر عني شوية..
ساعتها عرفت بأن ميزان العالم حتماً يخلت
ياااااااا من ..
قد من الله عليّ بحُبك ..
خليني أخربش وش البحر
علشان تظهر صورتك ..

على أغلفة الدواوين الشعرية
خليني أطرده حارس عينك
وأعين نفسي مكانه
خليني استكشف وسط حروف اللغة الضاد
عن حرف جديد يتسجل باسمك
عن بدر تملي ف ليلة أربعتاشر
عن أحلى قصيدة حب اتكتبت
عبر عصور الشعر
أو عن مسألة حسابية
- طبعاً ف عينيكي يكون الحل -
طب قلولي ازاى
ممكناً أصدق بعدك عني
مع إني ..
لو قالوا بأن الكرة الأرضية
أجازة من الدوارن ..
ممكناً ، عادي
لكن بعدك عني أصعب و أجل
لأنك أكبر من أي كلام في عيون الناس
وان الإحساس اللي بيتقطع ف عروقي
مكان الدم ..
هو اللي معيشني
وان النظرة الخارجة من نين عينيكي ..
عمال اتحايل ، يمكن يوم ترحمني



مع إني عزيز ..
بين أهله اتدل
إنتي بين كل نساء الدنيا اللاتي..
لا يعرفن اللف ولا الدوران
عرفت بأني بأعشقها بدرجة جيداً
وإني مهما وصلت لأعلى درجات التعليم ..
في العشق الساكن فيا
واللي مقرر تدريسه في كل مراحل تعليم الحب ..
ضعيف جداً
وعليّ إني اتعلم من ثاني
مع إني باعاني
وسط حوارى الروح المنهارة
والمحتارة ف زحمة من المخاليق
مش لاقية طريق
بين الشمس وبين الضل
لأنك ، وسط بنات أفكارى
اللي ببتمايل ، واللي ببتحايل ..
يوم تشغلني
إنتي وبس باشوفك فيهم
وانك ف عينيا ..
أجمل ما أبدعه الله عز وجل.

تمثال خشب

ياقة قميصي بتنتفض وتنور
تعبت من النومه
باينها راقدة بلا قومه
أوضاع كتير مابحبهاش
وحاجات كتير ماتحبنيش
أحلى ما في كلام
وفعل مافيش
وازي أعيش مصلوب على نفسي
تمثال خشب
بس الوجع ساكن في تجويفي
دمعي غرا ولكني متلصم
ماشي كدا أعمى وبرضه أصم
سوس الكلام أصعب من المسامير
والناس وشوشها قابلة للتزوير
وقلوب بلون الفل مفتوحة
زي السبيل دايمًا تجود بالخير
ولكنها متسلفنة ، متكرتنة ومعدّة للتصدير
حتى قصايدي كلها عفاريت
بتحب تخويفي



فينك يا موووووت
مستني إيه ؟
ماقتش اخاف منك
راضي بقضاء الله
طعم الحياة مفتوح
ولكنه مش ملكي
وجعي نزيف دايم مع الأنفاس
و ازاي راح اقدر أوقفك يا نزيف
هذا أنا ..
عمري على ورقة نتيجة بيترمي
وفاضلي كام ؟
ماقتش اخاف كل ما انام
متجمدة الأحلام على سريري
والحزن بحر بيتسع
شكلاً بشع
يا أيها الأيام يا مركبة هشة
ليه كل ما اجي أعوم ..
بتكتفي إيديا
وتكسري المجاديف
وازي أعيش مصلوب على نفسي
تمثال خشب
بس الوجد ساكن في تجويفي .



فحت البحر

ضاقت ولما استحكمت"
فتحكمت فيّ
وأنا اللي بالوهم ابتليت
بافحت بفاس العشق في بحر الهوى
أنا يا أنا يا سكة الأوهام ..
كوابيس على أحلام ..
مكتومة أنفاسها
عَضُض يا موج اليأس وبراحتك
في لحم المركب البايش
أحلامي معروضه ..
على المانيكان
أحلامي مصلوبه علي الجدران
وف الهامش
الاسم عايش للأسف
ولكني مش عايش
معجون يا بحر العشق بترابك
والشط نبت بالحصى
أنا من عصى العشق اللي طارح في الوريد
والخوف معشش تحت جلدي من زمن

الخوف من الجرح الجديد ..
ليكون تمن لمغامرة خسرانه
دمع ؛ يا نـن القلب ما تدمع
لسه الصداق في القلب ومسمّع
نفسى ف كيسين "كتافست" ادوبهم لاوجاعي
يا عشق ..
يا نايم على دراعي مكان كفني ..
طعم الجراح أحلو من دمعي
والنور بيستطعم ضياه
لحظة بُكا شمعي
سمعي أنا اللي خف من عيني
ولّا انطرح جمعي
وكأني لقطة اتكسرت
ساعة ما تتسرب خيوط نولها
حتى العواطف ميتة في القلب بينوا لها
مين اللي بينولها
إلا اللي مش محتاج
يا أيها السر اللي لأبد ف الحشا ..
عمّال اداري وللأسف
دمعي وشى
متوحشة الدنيا كما إنتي هى ، متوحشة
وانا لسه مش عارف..
مجني عليا أنا ..

ولا أكون جاني
أنا ليه باشوفني رقصة ع السلم
ولا تكون سكينتي سرقاني .



الشاعر فى سطور

عبدالناصر عبدالحميد سعيد
الشهرة / عمرو المصري

- محاضر مركزى بهيئة قصور الثقافة
عضو نادى أدب روض الفرج
- تم عمل دراسة نقدية عن اعماله فى مؤتمر ادباء مصر
وطبعها فى كتاب الابحاث عام ٢٠١١ بالجيزة د/ محمد احمد
اسماعيل
- تم عمل دراسة نقدية عن اعماله فى المؤتمر الاقليمى د /
حسام عقل
- ترجم له بعض اعماله من هيئة قصور الثقافة الى
الانجليزية
- مارس كتابة فن السباعيات - المربعات - المتلوت
- له الكثير من الحفلات الخاصة

محتوى الكتاب

٢	بطاقة الكتاب
٤	قسم الشرطة
٨	فى محطة مصر
١١	لغتى
١٦	مشهد من العقل الباطن
١٩	مجهول
٢١	ما يطلبه المستمعون
٢٤	ورقة كوشيه
٢٧	شنطة إيدها
٢٩	خطين قلق
٣١	الفاعل مجهول
٣٤	تنازل
٣٥	حليب قشطة
٣٨	وباحسك
٤١	موجز الأنباء
٤٤	نقطة ومن آخر السطر
٤٧	بجد
٥٠	آه يا جريح
٥٣	المشهد
٥٦	ورقة بقرة



٦١		الزمكان
٦٤		حديقة الطفل
٦٦		ابن عز
٧١		لحظة طيش
٧٤		وضع يد
٧٦		شق القمر
٨٠		إتجاز
٨٢		هوه
٨٤		ألوان الطيف
٨٧		تمثال خشب
٨٩		فحت البحر
٩٢		الشاعر في سطور
٩٣		محتوى الكتاب